

羣

書

拾

補

新唐書糾謬

二十卷宋吳縝撰坊間所傳本序文首葉乃偽撰又第二十卷柳宗元傳以下

舊本爛脫復雜取他卷之文以相抵今據宋本補正其摛挾過當與不諧文法之失不暇論也

序

史才之難尙矣游夏聖門之高弟而不能贊春秋一辭自秦漢迄今千數百歲若司馬遷班固陳壽范曄之徒方其著書之時豈不欲曲盡其善而傳之無窮然終亦未免後人之詆斥至唐獨稱劉知幾能於脩史之外毅然奮筆自爲一書貫穿古今譏評前載觀其以史自命之意殆以爲古今絕倫及取其嘗所論著而考其謬戾則亦無異於前人由是言之史才之難豈不信哉必也

編次事實詳略取捨褒貶文采莫不適當稽諸前人而不謬傳之後世而不疑粲然如日星之明符節之合使後學觀之而莫敢輕議然後可以號信史反是則篇帙愈多而譏譙愈眾柰天下後世何我宋之興一祖五宗重熙累洽尊儒敬道儲思藝文日以崇廣學校脩纂文史爲事故名臣綴輯不絕於時前朝舊史如唐書洎五代實錄皆已脩爲新書頒於天下其閒惟唐書自頒行迨今幾三十載學者傳習與遷固諸史均焉縝以愚昧從公之隙竊嘗尋閱新書閒有未通則必反覆參究或舛駁脫謬則筆而記之歲時稍久事目益眾深怪此書

牴牾穿穴亦已太甚揆之前史皆未有如是者推本厥
咎蓋脩書之初其失有八一日責任不專二曰課程不
立三曰初無義例四曰終無審覆五曰多採小說而不
精擇六曰務因舊文而不推考七曰刊脩者不知刊脩
之要而各徇私好八曰校勘者不舉校勘之職而惟務
苟容何謂責任不專夫古之脩史多出一家故司馬遷
班固姚思廉李延壽之徒皆父子論譔數十年方成故
通知始末而事實貫穿不牴牾也惟後漢東觀羣儒纂
述無統而前史譏之況夫唐之爲國幾三百年其記事
亦已眾矣其爲功亦已大矣斯可謂一朝之大典舉以

委人而不專其責則宐其功之不立也今唐史本一書也而紀志表則歐陽公主之傳則宋公主之所主既異

而不務通知其事故紀有失而傳不知

如膠東郡公道彥等紀書降封

縣公而傳乃郡公之類

傳有誤而紀不見

如朱宣傳敘天平節度使止有四人而紀則有

七人

之類豈非責任不專之故歟何謂課程不立夫脩一朝

之史其事匪輕若不限以歲月責其課程則未見其可

嘗聞脩唐書自建局至印行罷局幾二十年脩書官初

無定員皆兼涖它務或出領外官其書既無期會得以

安衍自肆苟度歲月如是者將十五年而書猶未有緒

暨朝廷訝其淹久屢加督促往往遣使就官所取之於

是乃倉猝牽課以書來上然則是書之不能完整又何足怪豈非課程不立之故歟何謂初無義例夫史之義例猶網之有綱而匠之繩墨也故唐脩晉書而敬播令狐德棻之徒先爲定例蓋義例既定則一史之內凡秉筆者皆遵用之其取捨詳略褒貶是非必使後人皆有考焉今之新書則不然取彼例以較此例則不同取前傳以比後傳則不合詳略不一

如中宗紀前與諸帝紀不同諸帝紀亦自詳略

不同去取未明

如皇太子改名并誕節名及上一壽皆不書而上尊號則書之類

一史之

內爲體各殊豈非初無義例之故歟何謂終無審覆方新書來上之初若朝廷付之有司委官覆定使詰難糾

駁審定刊脩然後下朝臣博議可與未可施用如此則
初脩者必不敢滅裂審覆者亦不敢依違庶乎得爲完
書可以傳久今其書頒行已久而疎謬舛駁於今始見
豈非終無審覆之故歟何謂多採小說而不精擇蓋唐
人小說類多虛誕而脩書之初但期博取故其所載或
全篇乖牾如代宗母吳皇后傳之類豈非多採小說而不精擇之故
歟何謂務因舊文而不推考夫唐之史臣書事任情者
多矣如吳兢書魏齊公事可以推知當日史臣書事與
奪止在其筆端又如辛雲京自立而傳止稱其朝
命李德裕執政增脩其父吉甫美事之類安可悉依徇而書今之新書乃殊
不參較但循舊而已故其失與唐之史臣無異如太宗放死囚

三百九十人義陽宣城
公主四十不嫁之類

豈非務因舊文而不推考之故

歟何謂刊脩者不知刊脩之要而各徇私好夫爲史之
要有三一曰事實二曰褒貶三曰文采有是事而如是
書斯謂事實因事實而寓懲勸斯謂褒貶事實褒貶既
得矣必資文采以行之夫然後成史至於事得其實矣
而褒貶文采則闕焉雖未能成書猶不失爲史之義若
乃事實未明而徒以褒貶文采爲事則是旣不成書而
又失爲史之意矣新書之病正在於此其始也不考其
虛實有無不校其彼此同異脩紀志者則專以褒貶筆
削自任脩傳者則獨以文辭華采爲先不相通知各從

所好其終也遂合爲一書而上之故今之新書其閒或舉以相校則往往不啻白黑方圓之不同是蓋不考事實不相通知之所致也斯豈非刊脩者不知其要而各徇私好之故歟何謂校勘者不舉校勘之職而惟務苟容方新書之來上也朝廷付裴煜陳薦文同吳申錢藻使之校勘夫以三百年一朝之史而又脩之幾二十年將以垂示萬世則朝廷之意豈徒然哉若校勘者止於執卷唱讀案文讎對則是二三胥吏足辨其事何假文館之士乎然則朝廷委屬之意重矣受其書而校勘者安可不思必也討論擊難刊削繕完使成一家之書乃

稱校勘之職而五人者曾不聞有所建明但循故襲常
惟務嗜嘿致其閒詛文謬事歷歷具存自是之後遂頒
之天下矣豈非校勘者不舉其職而惟務苟容之故歟
職是八失故新書不能全美以稱朝廷纂脩之意愚每
感憤歎息以爲必再加刊脩乃可貽後况方從宦巴峽
僻陋寡聞無他異書可以考證止以本史自相質正已
見其然意謂若廣以它書校之則其穿穴破碎又當不
止此而已也所記事條叢雜無次難於檢閱方解秩還
朝舟中無事因取其相類者略加整比離爲二十門列
之如左名曰新唐書糾謬謂摛舉其謬誤而已膚淺之

見烏足貽之同志姑投之巾笥以便尋繹而備遺忘云
元祐四年己巳歲八月望日夷陵至喜亭咸林吳縝序
表不錄

第二十卷尾缺葉今從嘉定錢詹事大昕所據宋本

補於後

宋本一百廿八
行行廿四格

柳宗元傳

柳宗元傳貞符內云後之祇淫囂昏好怪之徒

今案此囂字疑是囂字

又云琢斲屠剔膏流節解之禍不作

今案此琢字疑是椽字

盧懷慎及吐蕃等傳

盧懷慎傳疆場有警

吐蕃傳疆場不定又云疆場不明

今案此皆合作場

李晟贊

李晟傳贊云捉孤軍抗羣賊身佩安危而氣不少衰

今案郭子儀傳贊曰子儀自朔方提孤軍轉戰逐北諛不返顧又五王贊曰五王提衛兵誅嬖臣中興唐室蓋提之爲言總勒統御之謂若乃命之爲捉於文殊爲不典今李晟贊所謂捉孤軍者卽提

字之誤歟

韓愈傳

韓愈傳所要光決于心

今案乃是先決于心

又贊云無柢悟聖人者

今案當作抵

又云以苟況揚雄爲未淳

今案當作醇

劉武周傳

劉武周傳云破之于美食川

今案獨孤懷恩及秦瓊傳皆爲美良川蓋良誤爲食也

蘇定方傳

蘇定方傳云縛賀魯以還又云遂面縛降

今案其字皆當作縛

此書有海虞趙開美校刻本序文完全唯末卷尾缺向借得元板新唐書案此目求之妄意補綴今旣得吳氏元本如盧懷慎傳及吐蕃傳李晟贊余所擬適與之同餘不盡合余所指爲訛字者今業已改正唯柳宗元傳一條云管仲遇盜升爲功臣案功臣當爲

公臣今官本猶作功臣姑附記於此

山海經圖讚晉郭璞注山海經并作圖讚自來刻山
註多附見而不全唯道藏本全載於經注之後與經
文時有異同今各如其文錄之以明刻郭宏農集相
參校後有刻山海經者
必并刻此方成全書
南山經諸讚竝多失次
今亦悉仍其舊

桂

桂生南裔枝華集作拔萃岑嶺廣莫熙葩凌霜津穎氣王百

藥森然雲挺

迷穀

爰有奇樹產自招搖厥華流光上映垂霄佩之不惑潛

有靈標

徃徃

徃徃似猴走立行伏權木挺力少辛明目蜚廉迅足豈
食斯肉

水玉

水玉沐浴潛映洞淵赤松是服靈蛻乘煙吐納六氣昇
降九天

白猿

白猿肆巧由基撫弓應眇而號神有先中數如循環其
妙無窮

鹿蜀

鹿蜀之獸馬質虎文攘此吟鳴矯足騰羣佩其皮毛子孫如雲

鱧

魚號曰鱧處不在水厥狀如牛鳥翼蛇尾隨時隱見倚乎生死

類

類之爲獸一體兼二近取諸身用不假器窈窕是佩不知妬忌

搏訖

搏訖似羊眼反在背視之則奇推之無怪若欲不恐厥

皮可佩

祝茶草旋龜鵠鵠鳥

鵠舊作鵠諺案此鳥急性人
之急性者名慙慙列子力命

篇作慙慙與慙慙同鳥
之性亦相似故名相似

祝茶嘉草食之不饑鳥首虬尾其名旋龜鵠鵠六足三

翅竝翬

灌灌鳥赤鱗

厥聲如訶厥形如鳩佩之辨惑出自青丘赤鱗之物魚
身人頭

鵠鳥

彗星橫天鯨魚死浪鵠鳴於邑賢士見放厥理至微言

之無況

猾褻

猾褻之獸見則興役膺政而出匪亂不適天下有道幽形匿跡

長右彘

長右四耳厥狀如猴實爲水祥見則橫流彘虎其身厥尾如牛

會稽山

禹祖會稽爰朝羣臣不虔是討乃戮長人玉璽表夏多石勒秦

患經作

有獸無口其名曰患害氣不入厥體無閒至理之盡出
乎自然

犀

犀頭如猪形兼牛質角則併三分身互出鼓鼻生風壯
氣隘溢

兕

兕推壯獸似牛青黑力無不傾自焚以革皮充武備角
助文德

象

象實魁梧體巨貌詭肉兼十牛目不踰豕望頭如尾動
若丘徒

纂雕瞿如鳥虎蛟

纂雕有角聲若兒號瞿如三手厥狀似鵝魚身蛇尾是
謂虎蛟

鳳

鳳皇靈鳥實冠羽羣八象其體五德其文羽翼來儀應
我聖君

育隧谷

育隧之谷爰含飢風青陽既謝氣應祝融炎雰是扇以

散鬱隆

鱒魚鰓鳥

鰓鳥栖林鱒魚處淵俱爲旱徵災延普天測之無象厥

數推乎

推疑惟

白蒼

白蒼舉

同舉

蘇其汁如飴食之辟穀味有餘滋逍遙忘勞

窮生盡期

西山經

羴羊

月氏之羊其類在野厥高六尺尾亦如馬何以審之事

見爾雅

太華山

華嶽靈峻削成四方爰有神女是挹玉漿其誰遊之龍
駕雲裳

肥遺蛇

肥遺爲物與災合契鼓翼陽山以表亢厲桑林旣禱倏
忽潛逝

鴟渠赤鷺鳥文莖木鴟鳥

鴟渠已殃赤鷺碎火文莖愈聾是則嘉果鴟亦衛災厥
形惟麼

流赭

沙則潛流亦有運赭于以求鐵趨在其下謁牛之癘作采于社

豪彘

剛鬣之族號曰豪彘毛如攢錐中有激矢厥體兼資自爲牝牡

黃蘗草肥遺鳥鴛獸

浴疾之草厥子赭赤肥遺似鷄其肉已疫鴛獸長臂爲物好擲

橐蜚

有似人面一脚孤立性與時反冬出夏蟄帶其羽毛迅
雷不入

桃枝

嶠冢美竹厥號桃枝叢薄幽藹從容鬱猗簞以安寢杖
以扶危

杜衡

徃徃犇人杜衡走馬理固須因體亦有假足駿在咸安
事御者

菁容草谿邊獸樸鳥

有華無實菁容之樹谿邊類狗皮厥妖壘黑文赤翁鳥

羣書拾補

史

愈隱痔

礪石

稟氣方殊舛錯理微礪石殺鼠蠶食而肥物性雖反齊之一歸

猥如

猥如之獸鹿狀四角馬足人手其尾則白貌兼三形攀木緣石

鸚鵡

鸚鵡慧鳥青羽赤喙四指中分行則以背自貽伊籠見幽坐趾

數斯鳥擊獸鷓鳥

數斯人脚厥狀似鷓擊獸大眼有鳥名鷓兩頭四足翔若合飛

鸞鳥

鸞翔女牀鳳出丹穴拊翼相和以應聖哲擊石靡詠詔音其絕

鳧後鳥朱厭獸

鳧後朱厭見則有兵類異感同理不虛行推之自然厥數難明

蠻蠻

比翼之鳥似鳧青赤雖云一形氣同體隔延頸離鳥翻
飛合翮

丹木玉膏

丹木焯焯沸沸玉膏黃軒是服遂攀龍豪眇然升遐羣
下鳥號

瑾瑜玉

鍾山之寶爰有玉華光彩流映氣如虹霞君子是佩象
德閑邪

鍾山之子鼓欽鴉

欽鴉及鼓是殷祖江帝乃戮之崑崙之東二子皆化簞

翼亦同

鱈魚

見則邑穰厥名曰鱈經營二海矯翼閒霄唯味之奇見
歎伊庖

神英招

槐江之山英招是主巡遊四海撫翼雲儻實惟帝囿有
謂予圃

搖木

搖惟靈樹爰生若木重根增駕流光秀燭食之靈化榮
名仙錄

崑崙丘

崑崙月精水之靈府惟帝下都西老之宇嶸然中峙號曰天柱

神陸吾

肩吾得一以處崑崙開明是對司帝之門吐納靈氣熊熊魂魂

土螻獸欽原鳥

土螻食人四角似羊原欽類蜂大如鴛鴦觸物則斃其銳難當

沙棠

安得沙棠制爲龍舟汎彼滄海眇然遐遊聊以逍遙任
波去畱經中注引銘曰安得沙棠刻以爲舟汎彼滄海以邀以遊疑古有此銘詞若卽郭氏自作似不應引入注中今贊大同小異疑卽襲用古銘然改易處頗不如元文

鶉鳥沙棠實贊草

司帝百服其鳥名鶉沙棠之實惟果是珍爰有奇菜厥
號曰贊

神長乘

九德之氣是生長乘人狀狗尾其神則凝妙物自潛世
無得稱

西王母

天帝之女蓬髮虎顏穆王執贄賦詩交歡韻外之事難以具言

積石

積石之中實生重河夏后是導石門湧波珍物斯備比奇崑阿

白帝少昊

少昊之帝號曰金天魄氏之宮亦在此山是司日入其景則圓

猗

章峩之山奇怪所宅有獸似豹厥色惟赤五尾一角鳴

如擊石

畢方

畢方赤文離精是炳旱則高翔鼓翼陽景集乃流災火
不炎正

文貝

先民有作龜貝爲貨貴以文彩賈以小大簡則易從
從藏本犯而不過資今

天狗

乾麻不長天狗不大厥質雖小禳災除害氣之相王在
乎食帶

三青鳥

山名三危青鳥所解

憩藏本解謂解羽也

往來崑崙王母是隸穆

王西征旋軫斯地

江疑獬豸獸鸚鳥

江疑所居風雲是潛獸有獬豸毛如披蓑

韻不叶或云有遲一音未

詳鸚鳥一頭厥身則兼

神耆童

頴頊之子嗣作火正鏗鎗

鎗

其鳴聲如鐘磬處于驪山

唯靈之盛

帝江

質則混沌神則旁通自然靈照聽不以聰強爲之名曰
惟帝江

獬豸鵠鷓鳥

獬豸經
作謹

鵠鷓三頭獬豸三尾俱禦不祥消凶辟昧君子服之不
逢不魘

當尾

鳥飛以翼當尾則鬚廢多任少沛然有餘輪運於轂至
用在無

白狼

矯矯白狼有道則遊應符變質乃銜靈鈎惟德是適出

殷見周

白虎

魁魘之虎仁而有猛其質載皓其文載炳應德而擾止
我交境

駁

駁惟馬類實畜之英騰髦驤首噓天雷鳴氣無不凌吞
虎辟兵

神媿蠻蠻髯遺魚

其音如吟一脚人面鼠身鼈頭厥號曰蠻目如馬耳食
厭妖變

懷木

懷之爲木厥形似槿若能長服拔樹排山力則有之壽亦宐然

鳥鼠同穴山

鷄鷄二蟲殊類同歸聚不以方或走或飛不然之然難以理推

鰲魼魚

形如覆鉢包玉含珠有而不積泄以尾閭闔與道會可謂奇魚

丹木

爰有丹木生彼洧盤厥實如瓜其味甘酸謁疴辟火用
奇桂蘭

窮奇獸鱸魚孰湖獸

窮奇如牛蝟毛白表濛水之鱸匪魚伊鳥孰湖之獸見
人則抱

鱸魚

物以感應亦不數動壯士挺劍氣激白虹鱸魚潛淵出
則邑悚

北山經

水馬

馬寔龍精爰出水類渥洼之駿是靈是瑞昔在夏后亦有何駟

儵魚

汨

汨今從吳改

和損平莫慘於憂詩詠萱草山經

與上詩詠相對成文

集作帶山非

則儵壑焉遺岱聊以盤遊

臞疏獸鵠鷓鳥何羅魚

厭火之獸厥名臞疏有鳥自化號曰鵠鷓一頭十身何羅之魚

孟槐

孟槐似貍其豪則赤列象畏獸凶邪是辟氣之相勝莫

見其迹

鰓鱗魚

鼓翮一揮十翼翮翻厥鳴如鵲鱗在羽端是謂怪魚食之辟燔

橐駝

駝惟奇畜肉鞍是被迅駑流沙顯功絕地潛識泉源微乎其智

耳鼠

蹠實以足排虛以羽翹尾翮飛奇哉耳鼠厥皮惟良百毒是禦

幽頰

幽頰似猴俾愚作智觸物則笑見人佯睡好用小慧終是嬰繫

寓鳥孟極足訾獸

鼠而傳翼厥聲如羊孟極似豹或倚無良見人則呼號曰足訾

此段似有誤

鷓鳥

毛如雌雉朋翔羣下飛則籠日集則蔽野肉驗鍼石不勞補寫

諸健獸白鶴竦斯鳥

諸犍善吒行則銜尾白鶴竦斯厥狀如雉見人則跳頭

文如繡

疑繡
或緇

磁石

磁石吸鐵瑋瑁

藏同一作琥珀
乃虎魄之俗

取芥氣有潛感數亦冥

會物之相投出乎意外

旄牛

牛充兵機兼之者旄冠于旌鼓爲軍之標匪肉致災亦

毛之招

長蛇

長蛇百尋厥鬣如彘飛羣走類靡不吞噬極物之惡盡

毒之厲

山獬

山獬之獸見人歡譴厥性善投行如矢激是惟氣精出則風作

窳窳諸懷獸鱗魚肥遺蛇

窳窳諸懷是則害人鱗之爲狀羊鱗黑文肥遺之蛇一頭兩身

鯀魚

陽鑿動日土蛇致宵微哉鯀魚食則不驕物在所感其用無標

狍鴞

狍鴞貪林其目在腋食人未盡還自齧割圖形妙鼎是謂不若

狍間驛馬獨裕

有獸如豹厥文惟縟閭善躍嶮驛馬一角虎狀馬尾號曰獨裕

鶯鷓

禦暘之鳥厥名鶯鷓昏明是互晝隱夜覲物貴應用安事鶯鷓

居暨獸器鳥三桑

居暨豚鳴如彙赤毛四翼一目其名曰鷲三桑無枝厥
樹唯高

驪獸

驪獸四角馬尾有距涉歷歸山騰嶮躍咀厥貌惟奇如
是旋舞

天馬

龍馮雲遊騰蛇假霧未若天馬自然凌翥有理懸運天
機潛御

鷓居

鷓居如烏青身黃足食之不饑可以碎穀內厥唯珍配

彼丹木

飛鼠

或以尾翔或以髯凌飛鼠鼓翰脩然背騰用無常所惟神是馮

鵯鵯象蛇鮎父魚

有鳥善驚名曰鵯鵯象蛇似雉自生子孫鮎父魚首厥體如豚

酸與

景山有鳥稟形殊類厥狀如蛇腳三

舊二據經改

翼四見則

邑恐食之不醉

鳩鵲黃鳥

鳩鵲之鳥食之不瞧爰有黃鳥其鳴自叫婦人是服嬌
情易操

精衛

炎帝之女化爲精衛沈形東海靈爽西邁乃銜木石以
填波害

辣辣羆九獸大蛇

辣辣似羊眼在耳後竅生尾上號曰羆九

經多脫九字
藏本有之此

更可證幽都之山大蛇牛响

東山經

羣書考補

史

鱗鱗魚從從

經作從從

獸螢鼠

魚號鱗鱗如牛虎駁從從之狀似狗六腳螢鼠如雞見則旱涸

倮鱗

倮鱗蛇狀振翼灑光憑波騰逝出入江湖見則歲旱是維火祥

狃狃

蚌則含珠獸胡不可狃狃如豚被褐懷禍患難無由招之自我

堪孖魚輪輪獸

堪孖幹幹殊氣同占見則洪水天下昏墊豈伊妄降亦
應牒讖

珠蟹魚

澧水之鮮形如浮肺體兼三才以貨買害厥用既多何
以自衛

犰狳

玉篇犰作犰音几
廣韻仍作犰音仇

犰狳之獸見人佯眠與災協氣出則無年此豈能爲歸
之於天

狸力獸鴛胡鳥

狸力鴛胡或飛或伏是惟土祥出興功築長城之役同

集秦域

朱孺

朱孺無奇見則邑駭通感靡誠維數所在因事而作未始無待

獬獬蠶蚺獸絜鉤鳥

蚺經作
姪疑譌

獬獬如狐有翼不飛九尾虎爪號曰蠶蚺絜鉤似鳧見則民悲

衮衮

治在得賢亾由失人衮衮之來乃致狡賓歸之冥應誰見其津

螭龜

水圓四十潛源溢沸靈龜爰處掉尾養氣莊生是感揮
竿傲貴

娑胡精精獸鯨魚

娑胡之狀似麋魚眼精精如牛以尾自辨鯨魚所潛厥
深無限

獨狙獸魋雀

獨狙狡獸魋雀惡鳥或狼其體或虎其爪安用甲兵擾
之以道

芑木

馬維剛駿塗之芑汁不勞孫陽自然閑習厥術無方理
有潛執

芑魚薄魚

有魚十身蘼蕪其臭食之和體氣不下溜薄之躍淵是
維炎候

合窳

豬身人面號曰合窳厥性貪殘物靡
舊爲不咀至陰之
精見則水雨

當康獸鰓魚

當康如豚見則歲穰鰓魚鳥翼飛乃流光同出殊應或

災或祥

蜚

蜚則災獸跋踵厲溪會所經涉竭水槁林稟氣自然體
此殃注

中山經

桃林

桃林之谷實惟塞野武王克商休牛風馬阨越三塗作
嶮西夏

鳴石

金石同類潛響是韞擊之雷駭厥聲遠聞苟以數通氣

無不運

旋龜人魚修辟

聲如破木號曰旋龜修辟似鼉厥鳴如鴟人魚類歸出
于洛伊

帝臺棋

苾苾帝臺維靈之貴爰有石棋五彩煥蔚觴禱百神以
和天氣

若華烏酸草

療瘡之草厥實如瓜烏酸之葉三成黃華可以爲毒不

畏虺蛇

虺卽虺字
作虺譌

菘草

菘草黃華實如菟絲君子是佩人服媚之帝女所化其
理難思

山膏獸黃棘

山膏如豚厥性好罵黃棘是食匪子疑匪化雖無貞操

理同不嫁

三足龜

造物維均靡偏靡頗少不爲短長不爲多賁能三足何
異龜鼈

嘉榮

靈維天精動心駭目曷以禦之嘉榮是服所正者神用
口腸腹

天楸牛傷文獸臙魚

牛傷鎮氣天楸弭噎文獸如蜂枝尾反舌臙魚青班處
于達穴

帝休

帝休之樹厥枝交對竦本少室曾陰雲霧君子服之匪
怒伊愛

泰室

嵩維岳宗華岱恆衡氣通天漢

一作神洞幽明巍

然中立眾山之英

栳木

爰有嘉樹厥名曰栳薄言采之窈窕是服君子維歡家
無反目

藟草

藟草赤莖實如嬰菓食之益智忽不自覺殆齊生知功
奇於學

鷓鴣鳥

鷓鴣之爲鳥同羣相爲畸類被侵雖死不避毛飾武士兼
屬以義

鳴蛇化蛇

鳴化二蛇同類異狀拂翼俱遊騰波漂浪見則竝災或淫或亢

赤銅

昆吾之山名銅所在切玉如泥火炙有彩尸子所歎驗之汲宰波一作彼

神熏池

秦逢虎尾武羅人面熏池之神厥狀不見爰有美玉河林如檮

神武羅

有神武羅細胷白齒聲如鳴珮以鍊貫耳司帝密都是
宐女子

鵙鳥

鵙鳥似鳧翠羽朱目既麗其形亦奇其肉婦女是食子
孫繁育

荀草

荀草赤實厥狀如菅婦人服之練色易顏夏姬是豔厥
媚三還

如還童之還
集作遷似非

馬腹獸飛魚

馬腹之物人面似虎飛魚如豚赤文無羽食之辟兵不

畏雷鼓

神泰逢

神號泰逢好遊山陽濯足九州出入流光天氣是動孔
甲迷惶

葡柏

葡柏白華厥子如丹實肥變氣食之忘寒物隨所染墨
子所歎

橘櫟

厥苞橘櫟奇者維甘朱實金鮮葉蒨翠藍靈均是詠以
爲美談

積

大駝之山爰有苹草青華白實食之無夭雖不增齡可
以窮老

鮫魚

魚之別屬厥號曰鮫珠皮毒尾匪鱗匪毛可以錯角兼
飾劔刀

鳩鳥

蝮維毒魁鳩鳥是噉拂翼鳴林草瘁木慘羽行隱戮厥
罰難犯

椒

椒之灌植實繁有倫拂穎霑霜朱實芬辛服之不已洞見通神

神農圖計蒙涉蠱

涉蠱三脚蠱圖虎爪計蒙龍首獨稟異表升降風雨茫茫涉涉

岷山

岷山之精上絡東井始出一勺終致淼冥作紀南夏天清地靜

夔牛

西南巨牛出自江岷體若垂雲肉盈千鈞雖有逸力難

以揮輪

崂山

邛崂峻嶮其坂九折王陽逡巡王尊逞節殷有三仁漢
稱二哲

狔狼雍和狨獸

狔狼之出兵不外擊雍和作恐狨乃流疫同惡殊災氣
各有適

蝮

寓屬之才莫過于蝮兩則自懸塞鼻以尾厥形雖隨列
象宗彝

熊穴

熊山有穴神人是出與彼石鼓象殊應一祥雖先見厥
事非吉

跂踵

青耕禦疫跂踵降災物之相反各以氣來見則民咨實
爲病媒

蛟

匪蛇匪龍鱗彩炳煥騰躍波濤蜿蜒江漢漢武飲羽伏
飛壘斷

神耕父

清冷之水在乎山頂耕父是游流光灑景黔首祀崇以
弭災眚

九鐘

嶢崩涇竭麟鬪日薄九鐘將鳴凌霜乃落氣之相應觸
感而作

嬰勺

支離之山有鳥似鵲白身赤眼厥尾似勺維彼有斗不
可以酌

獐

有獸虎爪厥號曰獐好自跳撲鼓甲振奮若食其肉不

覺風迅

帝臺漿

帝臺之水飲竭心病靈府是滌和神養性食可逍遙濯
髮浴泳

狙如

狙如微蟲厥體無害見則興師兩陣交會物之所感焉
有大小

帝女桑

爰有洪桑生濱淪潭厥圍五丈枝相交參圍客是採帝
女所蠶

梁渠移卽聞獫獸馭鯨鳥

梁渠致兵移卽起災馭鯨辟火物各有能聞獫之見大風乃來

神于兒

于兒如人蛇頭有兩常遊江淵見于洞廣乍潛乍出神光惚恍

神二女

神之二女爰宅洞庭游化五江惚恍一本竊異號曰夫

人是維湘靈

飛蛇

騰蛇配龍因霧而躍雖欲登天雲罷陸莫材非所任難
以久託

海外南經

自此山來蟲爲蛇蛇號爲魚

賤無定貴貴無常珍物不自物自物由人萬事皆然豈
伊蛇鱗

羽民國

鳥喙長頰羽生則卵矯翼而翔龍飛不遠人維倮屬何
狀之反

神人二八

羽民之東有神司夜二八連臂自相鷓鴣晝隱宵出詭
時淪化

謹頭國

謹國鳥喙行則杖羽潛于海濱維食杞稷實維嘉穀所
謂濡黍

厭火國

有人獸體厥狀怪譎吐絡炎精火氣隨烈推之無奇理
有不熱

三株樹

三株所生赤水之際翹葉柏竦美壯若萐灌彩丹波自

相霞映

疑蔚

載國

不蠶不絲不稼不穡百獸率儻羣鳥拊翼是號載民自然衣食

貫胃交脛支舌國

鑠金洪鑪灑成萬品造物無私各任所稟歸於曲成是見兆朕

不死國

有人爰處圓丘之上赤泉駐年神木養命稟此遐齡悠悠無竟

鑿齒國

鑿齒人類實有傑牙猛越九嬰害過長蛇堯乃命羿斃之壽華

三首國

雖云一氣呼吸異道觀則俱見食則皆飽物形自周造化非巧

焦僥國

羣籟舛吹氣有萬殊大人三丈焦僥尺餘混之一歸此亦僑如

長臂國

雙肱三尺體如中人彼曷爲者長臂之民修脚是負捕魚海濱

狄山帝堯葬于陽帝嚳葬于陰

聖德廣被物無不懷爰乃殂落封墓表哀異類猶然矧乃華黎

視肉

聚肉有眼而無腸胃與彼馬勃頗相髣髴奇在不盡食人薄味

南方祝融

祝融火神雲駕龍駢氣御朱明正陽是含作配炎帝列

位于南

海外西經

夏后啓

筮御飛龍樂

果譌

舞九代雲融是揮玉璜是佩對揚帝德

稟天靈誨

三身國一臂國

品物流行以散混沌增不爲多減不爲損厥變難原請
尋其本

奇肱國

妙哉工巧奇肱之人因風構思制爲飛輪凌頽遂疑軌

帝湯是賓

形夭

仍其本文不改刑天

爭神不勝爲帝所戮遂厥形夭臍口乳目仍揮于戚雖化不服

女祭女戚

彼姝者子誰氏二女曷爲水閒操魚持俎厥儷安在離羣逸處

鳶鳥鶴鳥

有鳥青黃號曰鶴鳶與妖會合所集禍至類則梟鷂厥狀難媚

丈夫國

陰有偏化陽無產理丈夫之國王孟是始感靈所通桑石無子

女丑尸

十日竝燬女丑以斃暴于山阿揮袖自翳彼美誰子逢天之厲

巫咸

羣有十巫巫咸所統經技是搜術藝是綜採藥靈山隨時登降

并封

香齋抄卷一
五
龍過無頭并封連載物狀相乖如驥分背數得自通尋
之愈闕

女子國

簡狄有吞姜嫄有履女子之國浴于黃水乃娠乃字生
男則死

軒轅國

軒轅之人承天之祐冬不襲衣夏不扇暑猶氣之和家
爲彭祖

乘黃

飛黃奇駿乘之難老搖角輕騰忽若龍矯實鑿有德乃

集厥阜

滅蒙鳥大運山雄常樹

雄一本作
雉者是

青質赤尾號曰滅蒙大運之山百仞三重雄常之樹應
德而通

龍魚

龍魚一角似狸處陵俟時而出神聖攸乘飛鶩九域乘
雲上昇

西方蓐收

蓐收金神白毛虎爪珥蛇執鉞專司無道立號西阿恭
行天討

海外北經

無臂國

萬物相傳非子則根無臂因心構肉生魂所以能然尊形者存

燭龍

經作燭陰

天缺西北龍銜火精氣爲寒暑眼作昏明身長千里可謂至神

一目國

蒼四不多此一不少子野

師曠字作子野謠

冥瞽洞見無表形

遊逆旅所貴維眇

柔利國

柔利之人曲脚反肘子求之容方此無醜所貴者神形於何有

共工臣相柳

共工之臣號曰相柳稟此奇表蛇身九首恃力桀暴終禽夏后

深目國

深目類胡但疑藏本字不全頸絕縮軒轅道隆降款塞歸服穿曾長脚同會異族

聶耳國

山海經圖讚三十三 抱經堂本

聶耳之國海渚是縣雕虎斯使奇物畢見形有相須手
不離面

夸父

神哉夸父難以理尋傾沙逐日遞形鄧林觸類而化應
無常心

尋木

眇眇尋木生于河邊竦枝千里上干雲天垂陰四極下
蓋虞淵

跂踵國

厥形雖大斯脚則企跳步崔踴踵不闕地應德而臻款

塞歸義

歐絲野

女子鮫人體近蠶蚌出珠匪甲吐絲匪蛹化出無方物
豈有種

無腸國

無腸之人厥體維洞心實靈府餘則外用得一自全理
無不共

平丘

兩山之間丘號曰平爰有遺玉駿馬維青視肉甘華奇
果所生

駒駘

駒駘野駿產自北域交頸相摩分背翹陸雖有孫陽終不能服

北方禺彊

禺彊水神面色鰲黑乘龍踐蛇凌雲附翼靈一予冥立于北極

海外東經

君子國

東方氣仁國有君子薰華是食雕虎是使雅好禮讓委

蛇論理

論倫同

天吳

眈眈水伯號曰谷神八頭十尾人面虎身龍據兩川威
無不震

九尾狐

青丘奇獸九尾之狐有道翔見出則銜書作瑞周文以
標靈符

豎亥

禹命豎亥青丘之北東盡太遠西窮邠國步履宇宙以
明靈德

十日

十日竝出草木焦枯羿乃控弦仰落陽烏可謂洞感天人懸符

毛民國

牢悲海鳥西子駭麋或貴穴僮或尊裳衣物我相傾孰了是非

黑齒國兩師妾兮股國勞民國

陽谷之山國號黑齒兩師之妾以蛇掛耳兮股食軀勞民黑趾

東方句芒

有神人面身鳥素服銜帝之命錫齡秦穆皇天無親行

善有福

海內南經

臯陽

鬚鬣怪獸被髮操竹獲人則笑脣蔽其目終亦號咷反
爲我戮

狴狴

狴狴之狀形乍如犬厥性識往爲物警辨以酒招災自
貽纓冑

夏后啓臣孟涂

孟涂司巴聽訟是非厥理有曲血乃見衣所請靈斷鳴

呼神微

建木

爰有建木黃實紫柯皮如蛇纓葉有素羅

疑當作有葉若羅見高誘

注陸形訓

絕蔭弱水異人則過

氏人

炎帝之苗實生氏人死則復蘇厥身爲鱗雲雨

南是託

浮游天津

巴蛇

象實巨獸有蛇吞之越出其骨三年爲期厥大如何屈

生是疑

海內西經

貳負臣危

漢擊磐石其中則危劉生是識羣臣莫知可謂博物山海乃奇

流黃鄼氏國

城圍三百連阿河比棟動是塵昏烝氣霧重焉得遊之

以敖以縱

大澤方百里

地號積羽厥方百里羣鳥雲集鼓翅雷起穆王旋軫爰策騾耳

流沙

天限內外分以流沙經帶西極頽澹委蛇注于黑水永
溺餘波

木禾

崑崙之陽鴻鷺之阿爰有嘉穀號曰木禾匪植匪藝自
然靈播

開明

開明天獸稟茲金精虎身人面表此桀形瞪視崑山威
懾百靈

文玉玕琪樹

文玉玕琪方以類叢翠葉倚萎丹柯玲瓏玉光爭煥彩
豔火龍

不死樹

萬物暫見人生如寄不死之樹壽蔽天地請藥西姥烏
得如羿

甘水聖木

醴泉瑤木養齡

吳本作靈

盡性增氣之和祛神之冥何必生

知然後爲聖

窳窳

窳窳無罪見害貳負帝命羣巫操藥夾守遂淪溺淵變

爲龍首

服常琅玕樹

服常琅玕崑山奇樹丹實珠離綠葉碧布三頭是何遞
望遞顧

海內北經

吉良

金精朱鬣龍行駿跼拾節鴻鶩塵不及起是謂吉黃釋
聖爰里

蛇巫山鬼神蚺犬羣帝臺大蜂朱蛾

蚺犬說文
作蚺犬

蛇巫之山有人操杯鬼神蚺犬主爲妖災大蜂朱蛾羣

帝之臺

鬪非據比尸秣戎

秣疑當作秣

人面獸身是謂鬪非被髮折頭據比之尸戎三其角秣豎其眉

騶虞

怪獸五彩尾參於身矯足千里儵忽若神是謂騶虞詩歎其仁

冰夷

稟華之精練食石八乘龍隱淪往來海若是謂水仙號曰河伯

王子夜尸

于本多作子藏本
經及贊皆作子

子夜之尸體分成七離不爲疏合不爲密苟以神御形
歸於一

宵明燭光

水有佳人宵明燭光流耀河湄稟此奇祥維舜二女別
處一方

列姑射山大蟹陵魚

姑射之山寔栖神人大蟹千里亦有陵鱗曠哉溟海含
怪藏珍

蓬萊山

蓬萊之山玉碧構林金臺雲館疇哉獸禽實維靈府世
主甘心

海內東經

郁州

南極之山越處東海不行而至不動而改維神所運物
無常在

韓鴈始鳩雷澤神瑯瑤臺

韓鴈始鳩在海之州雷澤之神鼓腹優游瑯瑤嵯嶢邈
若雲樓

豎沙居絲埒端璽喚國

豎沙居絲埽端聖喚沙漠之鄉絕地之館或羈于秦或
賓于漢

大江北江南江浙江廬淮湘漢濛溫潁汝涇渭白
沅潁泗鬱肆潢洛汾沁濟滌虢沱漳水

川瀆交

一作綺

錯澳瀾流帶通潛潤下經營華外殊出同

歸混之東會

補遺

封豕

有物貪婪號曰封豕薦食無厭肆其殘毀羿乃飲羽獻
帝效伎

鼯鼠

鼯之爲鼠食烟棲林載飛載乳乍獸乍禽皮籍孕婦人
爲大任

弱水

弱出崑山鴻毛是沈北淪流沙南暎火林惟水之奇莫
測其深

都廣之野

都廣之野珍怪所聚爰有羔穀鸞歌鳳舞后稷託終樂
哉斯土

猩猩

能言之獸是謂猩猩厥狀似猴號音若嬰自然知往頗
測物情

若木

若生之木崑山是濱朱華電照碧葉玉津食之靈知爲
力爲神

翡翠

翠雀麋鳥越在南海羽不供用肉不足宰懷璧其罪賈
害以采

款冬

吹萬不同陽煦陰蒸款冬之生擢穎堅冰物休所安焉

知渙凝

鬼草

焉得鬼草是樹是藝服之不憂樂天儀世如波疑滾舟
任波流滯

蟒蛇

蠢蠢萬生成以類長惟蛇之君是謂巨蟒小則數尋大
或百丈

枳首蛇

夔稱一足蛇則二首少不知無多不覺有雖資天然無
異駢拇

鰈魚

鰈之爲狀半鳥半鱗形如雞鯉食之已疣

經亦作疣
叶未詳

飛魚

飛魚如豚赤文無羽服之不雷可以禦兵

疑是兵
可以禦

焦堯

焦堯極麼靖人惟小四體具足鬚眉才了

釋天地圖

自此至芣苢
舊皆有讚字

祭地肆瘞郊天致煙氣升太一精淪九泉至敬不文明
德惟鮮

星圖

茫茫地理燦爛天文四靈垂象萬類羣分眇觀六沚咎
徵惟君

炎山

木含陽氣精構則燃焚之無盡是生火山理見乎微其
妙在傳

筆

上古結繩易以書契經緯天地錯綜羣藝日用不知功
蓋萬世

龜

天生神物十朋之龜或游于火或游于著雖云類殊象

一一歸壹壹致用極數盡幾

蚌

萬物變蛻其理無方雀雉之化含珠懷璫與月盈虧協
氣晦望

蟬

蟲之精絮可貴惟蟬潛蛻棄穢飲露恆鮮萬物皆化人
胡不然

螢火

熠熠宵行蟲之微么出自腐草烟若散漂物之相煦孰
知其陶

芣苢

車前之草別名芣苢王會之云其實如李名之相亂在
乎疑似

杜若

蘼蕪善草亂之蛇牀不隕其實自別以芳佞人似智巧
言如簧

芙蓉

芙蓉麗草一曰澤芝泛葉雲布映波赧熙伯陽是食饗
比靈期

麻

草皮之良莫貴於麻用無不給服無不加至物在邇求
之好退

珪

玉作五瑞辨章有國君子鳴佩亦以表德永觀厥祭時
惟文則

尺蠖

貴有可賤賤有可珍嗟茲尺蠖體此屈伸論配龍蛇見
歎聖人

菊

菊名曰精布華兮月仙客薄采何憂華髮

萍

萍之在水猶卉植地靡見其布漠爾鱗被物無常託孰
知所寄

卷施

卷施之草拔心不死屈平嘉之諷詠以比取類雖邇興
有遠旨

螳螂

螳螂飛蟲揮斧奮臂當轍不迴可踐可遊勇士致斃厲
之以義

麟

麟惟靈獸與麀同體智在隱蹤仁表不抵孰爲來哉宣
尼揮涕

比肩獸

歷與岨虛乍兔乍鼠長短相濟彼我俱舉有若自然同
心共膂

鼎

九牧貢金鼎出夏后和味養賢以無化有赫赫三事鑒

于覆簌

餽同

金銀

惟金三品揚越作貢五材之珍是謂國用務經軍農爰

及雕弄

柚

厥苞橘柚精者曰甘實染繁霜葉鮮翠藍屈生嘉歎以
爲美談

與前大
同小異

梧桐

桐實嘉木鳳皇所棲爰伐琴瑟八音克諧歌以永言
嘒嘒

燕

燕燕于飛瑞娥以卵乎玉爰發聖敬日遠商人是頌詠
之弦管

馬

馬出明精祖自天駟十閑六種各有名類三才五御駑
駿異轡

貌

書稱猛士如虎如貌貌蓋豹屬亦曰執夷白狐之云自
疑是而非

鼪鼠

有鼠豹彩厥號爲鼪漢朝莫知郎中能名賞以束帛雅
業遂盛

鼪鼠

小鼠曰縫實有螫毒乃食郊牛不恭是告厥譴惟明徵
乎其覺疑先覺

鼯鼠

五能之鼠技無所執應氣而化翻飛駕集詩人歌之無
食我粒